

光緒山西通志

名宦錄一

錄一之一

山西通志第一

馬進士出身頭品頂戴部侍郎兼都察院右副都御史巡撫山西提督軍務臣張的魯

旨監修

循吏之稱仿於史遷所錄五人晉文之理李離與焉論者謂子長意有所諷故終以法官然其書曰奉職循理亦可以爲治何必威嚴有味乎言之厥後史家例傳循良蓋未嘗不本斯意以爲澄敘之準也晉古稱仕國五正佐封六卿讓善掌故所在師資俱存而唐風職思三語談吏治者至奉爲官箴則由霸圖而上企帝世允釐咸熙之盛或且藉風謠而並興而自漢以來治行可稽者代不過數人雖安靜之吏悃悃無華鄙朴之民不工頌禱抑亦乘史之闕略矣舊志職官後繼以名宦標統轄一目餘依府州類次茲既以題名者列入譜

乃采其政績別輯爲錄略以臺司守令庶官武職分目其使
臣容將舊同守土者今並附著從實也秦漢以前具詳世譜
者今不復及避複也譜斷止監司而此不遺未僚者斗量之
名有難悉數尸祝之惠未忍或湮也

臺司 漢至唐

郭伋字細侯扶風茂陵人少有志行王莽時爲并州牧更始
素聞伋名徵拜左馮翊建武十一年省朔方刺史屬并州帝
以盧芳據北土乃調伋爲并州牧過京師謝恩帝即引見并
召皇太子諸王宴語終日賞賜車馬衣服什物伋前在并州
素結恩德及後入界所到縣邑老幼相攜逢迎道路所過問
民疾苦聘求耆德雄俊設几杖之禮朝夕與參政事始至行
部到西河美稷有童兒數百各騎竹馬道次迎拜伋問兒曹

何自遠來對曰聞使君到喜故來奉迎伋辭謝之及事訖諸兒復送至郭外問使君何日當還伋謂別駕從事計日當告之行部既還先期一日伋爲違信於諸兒遂止於野亭須期乃入是時朝廷多舉伋可爲大司空帝以并部尙有盧芳之傲且塞北未安欲使久於其事故不召伋知盧芳夙賊難卒以力制常嚴烽候明購賞以結寇心芳將隨昱遂謀脅芳降伋芳乃亡入塞北伋以老病上書乞骸骨二十二年徵爲大中大夫明年卒

郭丹字少卿南陽穰人更始時舉賢能建武十三年大司馬吳漢辟舉高第再遷并州牧有清平稱轉使匈奴中郎將

蘇章字孺文扶風平陵人少博學能屬文安帝時應舉賢良方正對策高第爲議郎順帝時遷冀州刺史換爲并州刺史

以摧折權豪忤旨坐免隱身鄉里不交當世卒于家

周舉字宣光汝南汝陽人博學洽聞京師爲之語曰五經從橫周宣光舉茂才稍遷并州刺史太原一郡舊俗以介子推焚骸有龍忌之禁至其亡月咸言神靈不樂舉火由是士民每冬中輒一月寒食莫敢烟爨老小不堪歲多死者舉旣到州乃作弔書以置子推之廟言盛冬去火殘損民命非賢者之意以宣示恐民使還溫食於是衆惑稍解風俗頗革後徵拜尚書與僕射黃瓊同心輔政名重朝廷卒于光祿大夫詔令將大夫以下喪發日會弔加賜錢十萬以旌委蛇素絲之節焉

胡芳爲并州刺史度遼將軍皇甫規欲退身避第數上病不見聽會上郡太守王昱喪還規縞素越界到下亭迎之因令

客密告芳言規擅遠軍營公違禁憲當急舉奏芳曰威明欲
避第仕塗故激發我耳吾當爲朝廷愛才何能申此子計耶
遂無所問

宋果字仲乙扶風人性輕悍喜與人報仇爲郡縣所疾郭林
宗乃訓之義方懼以禍敗果感悔遂改節自飭後以烈氣聞
辟公府侍御史并州刺史所在能化

鄧盛爲并州刺史郡人路佛少無名行而太原太守王球召
以補吏郡吏王允固爭球欲殺允盛聞之馳傳辟允爲別駕
從事允由是知名而路佛以之廢棄

趙岐字邠卿京兆長陵人少明經有才藝仕州郡以廉直疾
惡見憚舉理劇爲皮氏長抑強討奸大興學校會河東太守
劉祐去郡而以中常侍左悺兄勝代之岐恥疾宦官即日西

歸後南部烏桓鮮卑畔公卿舉岐摧拜并州刺史岐欲奏守
邊之策未及上會坐黨事因換次以爲禦寇論又是時綱維
不攝閣豎專權嘗擬前代連珠之書四十章上之留中不出
而岐遂遭黨劄去建安六年卒著孟子章句三輔決錄傳於
時

段穎字紀明武威姑臧人舉孝廉延熹二年遷護羌校尉擊
燒當等八種羌破之五年遷并州刺史六年冬復以穎爲護
羌校尉擊滇那等羌凡百八十戰悉破之封新豐縣侯

張奐字然明敦煌酒泉人舉賢良對策第一永壽元年遷使
匈奴中郎將時休屠各及朔方烏桓燒度遼將軍門引屯赤
阡州火相望衆兵大恐奐安坐帷中與弟子講誦自若軍士
稍安乃潛誘烏桓陰與和通遂使斬屠各渠帥襲破其衆諸

部悉降延熹元年鮮卑寇邊奐率南部擊之斬首數百級後
遷度遼將軍數載間幽并清靜九年春徵拜大司農鮮卑聞
奐去其夏遂招結南部烏桓數道入塞復拜奐爲護匈奴中
郎將以九卿秩督幽并涼三州及度遼烏桓二營兼察刺史
二千石能否賞賜甚厚南部烏桓聞奐至因相率還降凡二
十萬口奐但誅其首惡餘皆慰納之唯鮮卑出塞去建寧元
年封侯奐深病爲曹節所賣上書固諫後以黨錮歸田里卒

右漢十人

制史九
督部一

梁習字子虞陳郡柘人建安中以別部司馬領并州刺史時
承高幹荒亂之餘張雄跋扈吏民多入其部落兵衆更相扇
動往往基跽習到官誘諭招納皆禮召其豪右稍稍薦舉使
詣幕府豪右已盡乃次發諸丁彊以爲義從又因大軍出征

分請以爲勇力吏兵已去稍移其家前後送鄴凡數百口其
不從命者興兵致討斬首千數降附者萬計諸部曲服事供
職同於編戶百姓布野勤勸農桑令行禁止貢達名士咸顯
於世魏武嘉之賜爵關內侯長老稱詠以爲自所聞識刺史
未有及習者建安十八年州并屬冀州更拜議郎西部都督
從事統屬冀州總故部曲又使於上黨取大材供鄴宮室習
表置屯田都尉二人各領六百夫於道次耕種菽粟以給人
牛之費習因交市斬鮮卑育黎餘衆破膽不敢動二十二年
令從事張景募鮮卑射殺叛亡烏丸王魯昔自後單于入侍
西北無虞習之績也魏初復置并州習復爲刺史晉申門亭
侯邑百戶政治常爲天下最太和二年徵拜大司農習在州
二十餘年而居處貧窮無方面珍物明帝異之禮賜甚厚四

年卒

田豫字國讓漁陽雍奴人耶陵侯曹彰征代郡以爲相彰平代皆豫策也魏文帝初持節護烏桓校尉封長樂亭侯爲校尉九年恆摧抑兼并乖散彊猾凡捕亡奸宄皆構刺攪離使凶邪之謀不遂聚居之類不安轉爲汝南太守領并州刺史外部聞其威名相率來獻豫性清約儉素賞賜皆散之將士素利等數來客見多遺牛馬豫悉轉送官皆以爲前所遺物顯露不如持金乃密懷金三十斤謂豫曰願避左右從之因跪曰我見公貧故前後遺公牛馬公輒送官今密以此上公可以爲家資豫張袖受之答其厚意去後皆悉付外具以狀聞詔褒之曰昔魏絳開懷以納戎今卿舉袖以受狄金朕甚嘉焉賜絹五百匹豫以其半藏少府後復來以半給與外夷

咸高豫節州界甯肅百姓懷之徵爲衛尉稱疾食卿祿卒嘉平六年下詔褒揚賜其家錢穀

陳泰字元伯潁川許昌人羣子正始中以遊擊將軍爲并州刺史加振威將軍使持節護匈奴中郎將懷柔夷民甚有威惠京邑貴人多寄寶貨因泰市奴婢泰皆掛之於壁不發其封及徵爲尙書乃悉還之終尙書左僕射贈司空謚穆

孫禮字德達涿郡容城人齊王時忤曹爽以并州多邊寇由城門校尉除并州刺史加振武將軍使持節護匈奴中郎將爽敗入爲司隸校尉凡臨七郡五州皆有威信遷司空封大

右魏四人 並刺史

魯芝字世英扶風郡人魏時爲使持節領護匈奴中郎將振

威將軍并州刺史以綏緝有方遷大鴻臚封陰平伯晉初進
侯上以芝清忠履正素無居宅使軍兵爲作屋五十間秦始
九年卒諡曰貞賜塋田百畝

劉琨字越石中山魏昌人少得儁朗之目與范陽祖納俱以
雄豪著名封廣武侯永嘉元年爲并州刺史加振武將軍領
匈奴中郎將九月末發以少擊衆冒險而進遂達壺口關請
穀五百萬斛絹五百萬匹棉五百萬斤許之時東瀛公騰自
晉陽鎮鄴并土饑荒百姓隨騰南下餘戶不滿二萬寇賊縱
橫道路斷塞琨募得千餘人轉鬪至晉陽府寺焚毀僵尸蔽
地其有存者饑羸無復人色荆棘成林豺狼滿道琨剪除荆
棘收葬枯骸造府朝建市獄寇盜互來掩襲恆以城門爲戰
場百姓負薪以耕屬隄而將琨撫循勞來甚得物情劉元海

時在離石相去三百許里琨密遣離問其部降者萬餘落元海甚懼遂城蒲子而居之在官未期流人稍復鷄犬之音復相接矣琨父蕃自洛赴之人士奔并者多歸於琨琨善於懷撫而短於控御一日之中雖歸者數千去者亦以相繼劉粲乘虛襲陷之琨父母並遇害琨引猗盧并力破粲猗盧留將箕澹段繁等戍之琨志在復讐而屈於力弱泣血尸立撫慰傷痍移居陽曲城以招集亡散愍帝初拜大將軍都督并州諸軍事加散騎常侍假節琨累上表謝辭甚悲壯三年遣大鴻臚趙廉持節拜司空都督并冀幽三州諸軍事表讓司空受都督尅期與猗盧舉兵會猗盧卒箕澹等率三萬人來歸琨復率數百騎自平城撫納之屬石勒攻樂平箕澹大敗琨遣不能復守遂走飛狐後爲段匹磾所害贈侍中太尉諡曰

愍琨少負志氣有縱橫之才善交勝已與范陽祖逖爲友聞逖被用與親故書曰吾枕戈待旦嘗恐祖生先吾著鞭其意氣相期如此在晉陽嘗坐圍城中窘迫無計琨乃乘月登樓清嘯賊聞之皆悽然長嘆中夜奏胡笳賊又流涕歎歎有懷土之切向曉復吹之賊並棄圍而走

右晉二人

並刺

元延爲并州刺史道武皇始二年并州守將封眞率其種族與徒何爲逆將攻延延討平之

樓伏連代人忠厚有器量從征姚平於柴壁以功賜爵安邑侯爲晉兵將軍并州刺史招誘西河曹成等七十餘人襲殺吐京護軍及其守士三百餘人并擒叛逆阿度支等二百餘家太宗嘉之拜成等將軍賜爵列侯後晉爵廣陵王薨諡恭

荀孤爲并州刺史不治產死之日家無餘財百姓追思之
孫小字茂翹咸陽石安人夏時沒入宮刑魏平統萬徙平城
以聰識有智略稱屢著戰功賜爵泥陽子出爲冠軍將軍并
州刺史晉爵中都侯州內四郡百餘人詣闕頌其政化小嘗
重郭祚門才以祚爲主簿兼任之以書記時人多之

崔元珍博陵安平人正光末山胡作逆除平陽太守假右將
軍爲別將以討之頻破賊郡內以安武泰初改郡爲唐州仍
除刺史加右將軍以破賊勳賜爵涼城侯爾朱榮之趣洛也
遣其都督樊子鶴取唐州元珍與行臺郎鄭暉拒守不從爲
子鶴所陷被害世咸痛之

崔衡字伯玉清河人襲父寬爵武陵公太和中以鎮西將軍
除秦州刺史先是河東年饑劫盜大起衡至修興遂之法勸

課農桑周年之間寇盜止息十二年卒諡惠

穆熊崇四世孫襲宜都王尙新平長公主除征東將軍吐京
鎮將熊賞善罰惡深自克勵時西河叛熊欲討之而離石都
將郭洛頭拒違不從熊遂上表自劾以威不攝下請就刑戮
高祖乃免洛頭官山賊劉什婆寇掠郡縣熊討滅之自是部
內肅然莫不敬憚後改吐京鎮爲汾州仍以熊爲刺史前吐
京太守劉升定陽令吳平仁熊以吏民懷之並爲表請高祖
皆從焉熊既頻薦升等所部守令咸自砥礪威化大行百姓
安之州民李軌郭及祖等七百餘人詣闕頌熊恩德高祖以
熊政和民悅增級延限後徵爲光祿勳卒贈鎮北將軍恆州
刺史

元安壽陽平王新城子景穆帝孫也高祖賜名頤累遷懷朔

鎮大將都督三道諸軍事北討詔徵赴京曷以戰伐之事對曰當仰仗廟算使呼韓同渭橋之禮帝歎曰壯哉王言朕所望也未發遣母憂詔遣侍臣以金革敦喻既殯而發與陸叡集三道諸將議軍途所謂於是中道出黑山東道趨土盧河西道向侯延河軍過大磧大破蠕蠕頽入朝詔曰王之前言果不虛也後除朔州刺史及恆州刺史穆秦謀反遣使推頽爲主頽密以狀聞秦等伏誅帝甚嘉之景明六年薨諡曰莊元匡字建扶廣平王洛侯嗣子性耿介有氣節孝文器之謂曰叔父必能儀刑社稷匡輔朕躬今可改名爲匡以成克終之美宣武時除肆州刺史廉慎自修甚有聲績遷恆州刺史後爲御史中尉封東平郡王卒諡文貞

元順字子和任城王澄長子九歲師事樂安陳豐初書王羲

之小學篇數千言晝夜誦之旬有五曰一皆通徹豐奇之曰
江夏黃童不得無雙也年十六通杜氏春秋篤志好古性蹇
謬淡於榮利累除給事黃門侍郎時領軍元義威勢尤盛順
願言正議曾不阿旨由此見憚出除平北將軍恆州刺史順
謂父曰北鎮紛紜方爲國梗桑乾舊都根本所繫請假都督
爲國捍屏父心疑難不欲授以兵官尋轉齊州刺史後除吏
部尙書兼僕射河陰之難爲陵戶鮮于康努所害家徒四壁
無以斂止有書數千卷而已謚文烈子朗年十七手刃康努
以首祭順墓

崔振字廷根博陵安平人挺之弟也少有學行居家孝友正
始初除龍驤將軍肆州刺史在任有政績還朝除河東太守
永平中卒於郡謚定振歷官四十餘載考課恆爲稱職議者

善之

尹馥代人少勇健走及奔馬曳牛卻行賜爵汾陽子世祖嘗問其欲馥曰中祕二省多諸文士若思矜不已請參其次世祖賢之拜祕書監以功晉魏安侯後出爲東雍州刺史恩化大行百姓思之又晉河南公累遷司空太安五年卒

司馬楚之字德秀晉宣帝弟太常馘之八世孫宋高祖夷司馬賊屬楚之亡匿諸沙門中濟江轉側汝潁之間收衆據長社歸之者常萬餘人太宗末遣使請降世祖初徵入朝封瑯邪王車駕伐蠕蠕詔與濟陰公盧中山等督運以繼大軍時鎮北將軍封沓亡入蠕蠕說令擊楚之等以絕糧運蠕蠕乃造奸覘入楚之軍截驢耳而去有告失驢耳者諸將莫能察楚之曰必是覘賊截之以爲驗耳賊將至矣即使軍人伐柳

爲城水灌之令東城立而賊至冰峻城固不可攻逼賊乃走
散世祖聞而嘉之尋拜假節侍中鎮西大將軍開府儀同三
司雲中鎮大將朔州刺史在邊二十餘年以清儉著聞和平
五年薨年七十五高宗悼惜之謚貞王陪葬金陵

司馬躍字寶龍楚之次子尚趙郡公主代兄金龍爲雲中鎮
將朔州刺史假安北將軍河內公躍請罷河西苑封與民墾
殖有司執奏此廢鹿所祭大官取給今若與民至於奉獻時
禽懼有所闕詔曰此地若任稼穡雖有獸利事須廢封若是
山澗虞禁何損尋先朝置此豈苟藉斯禽諒亦以俟軍行薪
蒸之用其更論之躍固請以與民高祖從之太和十九年卒
楚之父子相繼鎮雲中朔土服其威德

右後魏十二人

並刺
史

山西通志卷一百一 名臣金一
王思政太原祁人有籌策魏孝武封祁縣侯拜中軍大將軍
大都督總宿衛兵及西遷晉太原郡公大統中鎮宏農思政
以玉壁地在險要請築城卽自營度移鎮之遷并州刺史仍
鎮玉壁八年東魏來寇思政守禦有備敵人晝夜攻圍卒不
能克乃收軍還以全城功授驃騎大將軍復鎮宏農太祖命
舉代己者思政乃進所部都督韋孝寬其後東魏來攻孝寬
卒能全城時論稱其知人

宇文測字澄鏡少篤學旬月不窺戶牖尙宣武女陽平公主
從孝武入關封廣川縣公大統六年除使持節大都督行汾
州事測政存簡惠頗得民和地接東魏數相鈔竊或有獲其
爲寇者多縛送之測皆命解縛置之賓館然後引與相見如
客禮焉仍設酒餼宴勞放還其國并給糧餼衛送出境自是

東魏人大慙乃不爲寇汾晉之間各安其業兩界之民遂通慶弔不復爲仇讐矣時論稱之方於羊叔子

泉企孝武時爲東雍州刺史高歡專政孝武有西顧之心欲委企以山南之事乃除洛州刺史常州都督未幾孝武西遷高歡率衆至潼關企遣其子元禮督鄉里五千出大谷以禦之歡不敢進大行臺賀拔岳以企昔蒞東雍爲吏民所懷乃表復爲刺史詔許之

梁禦字善通其先安定人後因官北邊遂家於武川禦少好學長更好弓馬爾朱天光西討引爲左右其平關右封白水縣伯大統時晉爵廣平郡公出爲東雍州刺史爲政舉大綱而已民庶稱焉四年卒於州臨終惟以國步未康爲恨言不及家諡武昭

劉亮中山人少倜儻有縱橫計畧從賀拔岳西征常先鋒陷陣與諸將謀迎周太祖以勇敢見知爲時名將謀策又多合機宜太祖曰卿文武兼資卽孤之孔明也賜名亮封長廣郡公大統十年出爲東雍州刺史爲政清靜百姓安之在職三歲卒於州謚襄

右西魏五人

都督刺史

莫多婁貸文太安狄那人驍果有膽氣從齊神武平爾朱兆於赤嶺獲兆尸天平中除晉州刺史汾州胡賊爲寇竊神武親討之以貸文爲先鋒每有戰功遣賚奴婢三十人牛馬各五十匹布一千匹仍爲汾陝州東雍晉秦五州大都督後與太保尉景攻東雍南汾二州克之元象初與周軍戰沒於

源澗

房謨字敬叔河南洛陽人其先代人也少醇厚正光末厯代
郡太守著廉惠聲及六鎮亂謨率郡人入九嵎山結壘拒守
外無救援奔中山孝莊時除大甯太守爾朱榮死其黨徵兵
謨不應前後斬其三使及洛京陷爲賊黨建州刺史是蘭安
定執繫州獄蜀人聞謨被囚並叛安定給謨弱馬令軍前慰
勞諸賊見謨莫不遙拜謨先所乘馬安定別給將士戰敗蜀
人得之謂謨遇害莫不悲泣善養其馬不聽乘騎兒童婦女
競投草粟皆言是房公馬也其結愛人心如此孝靜時除晉
州刺史加驃騎大將軍又攝南汾州事先時境接西魏土人
多受其官爲之防守至是酋長鎮將及都督守令前後降附
者三百餘人謨撫接殷勤人樂爲用爰及深險胡夷咸來歸
附謨常以已祿物充其饗資齊文襄嘉之聽用公物西魏懼

乃增置城戍慕義者自相糾合擊破之自是龍門以北西魏
戍皆平文襄特賜粟千石絹二百匹班示天下卒於州州府
相率贈物及牛車妻子遵其遺志拒而不納贈司空諡曰文
惠

高市貴善無人少有武用孝昌初恆州內部勅勅劉倫等聚
衆反市貴爲都督率衆討倫一戰破之預翼戴莊帝勳爲秀
容大都督第一領民酋長賜爵上洛縣伯爾朱榮擊葛榮於
滏口爲先鋒都督榮平除使持節汾州刺史尋爲晉州刺史
紇豆陵步藩侵并州齊神武破之市貴亦從行有功封常山
郡公天平初復除晉州刺史尋以洪洞要險遣市貴鎮之沙
苑失利晉州行事封祖業棄城而還州民柴覽聚衆作逆命
市貴討覽覽奔柴壁市貴破斬之是時東雍南汾二州境多

盜因士貴平覽皆散歸復業後秀容人五千尸叛應山胡復
爲行臺統諸軍討平之元象中除晉州刺史西道軍司卒

右東魏三人

都督
刺史

慕容紹宗太原王恪後也自代攜家屬歸爾朱榮以軍功封
索盧縣子晉侯累遷并州刺史紇豆陵步藩逼晉陽爾朱兆
擊之累爲步藩所破欲於晉州徵高祖共圖步藩紹宗諫曰
今天下擾擾人懷覬覦正智士用策之秋高晉州才雄氣猛
英略蓋世譬諸蛟龍安可借以雲雨兆怒曰我與晉州推誠
相待何忽輒相猜阻橫生此言便禁止紹宗數日方釋遂割
鮮卑隸高祖高祖共討步藩滅之及高祖舉義信都兆命爲
行臺率軍壺關以抗高祖韓陵敗兆撫膺謂紹宗曰比用卿
言今豈至此兆走赤紘橫紹宗行到烏突城見高祖追至遂

攜榮妻子及兆餘衆自歸高祖仍加恩禮軍謀兵略時參預
焉元象初晉公後爲晉州刺史西道大行臺侯景叛命爲東
南道行臺擒梁貞陽侯淵明於寒山又迴軍大敗侯景於渦
陽別封永樂縣子初高祖末命世宗云侯景若反以慕容紹
宗當之至是竟立功效旋攻潁川堰洧水灌城暴風起艦飄
投水卒贈太尉謚曰景惠配饗世宗廟庭

高潛神武第十子少明慧天保初封任城王自孝昭武成時
車駕還鄴嘗令潛鎮晉陽總兵省事歷司徒大尉并省錄尚
書事天統三年拜太保并州刺史別封正平郡公時有婦人
臨汾水浣衣有乘馬人投其鞵而去者婦人持鞵詣州言之
潛召城外諸嫗以鞵示之給曰有乘馬人在路被賊劫害遺
此鞵焉得無親屬乎一嫗撫膺哭曰兒昨着此靴向妻家如

其語捕獲之時稱明察

高長恭文襄第四子封蘭陵王累遷并州刺史突厥入晉陽長恭盡力擊之後爲太尉與段韶討柏谷又攻定陽韶病長恭總其衆前後以戰功別封四郡公長恭面柔心壯音容兼美戰輒戴假面具爲將躬勤細事雖一瓜數果必與將士共之芒山大捷武士共歌謠爲蘭陵王入陣曲至定陽復告捷威名震敵國武平四年鳩卒贈太尉謚武

段韶字孝先姑臧武威人榮長子也少工騎射有將領才略從高祖出晉陽追爾朱兆於赤嶺平之武定四年從征玉壁五年世宗遣鄴韶留守晉陽世宗征潁川又留鎮晉陽行并州刺史齊天保四年封平原郡王大甯二年除并州刺史討平高歸彥於冀州仍蒞并州爲政舉大綱不存小察甚得

民和十二月周武帝遣將率羌夷與突厥合衆逼晉陽交戰大破之敵前鋒盡殲無復子遺晉位太師周遣尉遲迥等襲洛陽復督精騎一千發晉陽五日便濟河遂有邙山之捷除太宰又除右丞相武平二年正月出晉州道到定隴築威敵平寇二城而還二月周師來寇遣韶與右丞相斛律光大尉蘭陵王長恭同往捍禦以三月暮行達西境有柏谷城者乃敵之絕險石城千仞鳴鼓而攻之城潰獲儀同薛敬禮仍城華谷置戍而還是月周又遣將寇邊斛律光先率師出討韶亦請行五月攻服秦城周人於姚襄城南更起城鎮東接定陽又作深塹斷絕行道韶乃密抽壯士從北襲之又遣人潛度河告姚襄城中令內外相應度者千有餘人周人始覺於是合戰大破之獲其儀同若干顯寶等六月徙圍定陽其城

主開府儀同楊範固守不下韶登山望城勢乃縱兵急攻之
七月屠其外城大斬獲首級時韶病在軍中以子城未克謂
蘭陵王長恭曰此城三面重澗險阻並無走路唯恐東南一
處耳賊若突圍必從此出但簡精兵專守自是成擒長恭乃
令壯士千餘人設伏於東南澗口其夜果如所策賊遂出城
伏兵擊之大潰範等面縛盡獲其衆韶先遣竟以疾卒贈假
黃鉞相國謚忠武韶長於計略善於御衆得將士之和臨敵
人人爭奮又雅性溫慎有宰相之風齊世勲貴罕及

綦連猛字武兒代人歸高祖部步稽等起逆在覆釜山使猛
討之大捷特被賞資武定五年封石城縣開國子食肆州平
寇縣幹天保元年除都督東秦州刺史隨斛律敦北征茹茹
敦令猛輕將百騎深入胡候還至白道與軍相會因此追躡

遂大破之賚物三百段皇建元年封石城郡開國伯尋晉爵爲君河清二年突厥逼晉陽勅猛將三百騎覘賊遠近行至城北十五里遇賊前鋒以賊衆多遂漸退避賊中有一驍將超出來鬪猛遙見之卽挺身獨出與其相對俯仰之間刺賊落馬因卽斬之天統四年封義甯縣開國公五年除并省尙書左僕射又除并省尙書令封山陽王入周卒

高叡小名須拔父琛高祖弟也封南趙郡公斛斯椿等贊結高祖將謀內討以晉陽根本召琛掌留後事以爲并肆汾大行臺僕射領六州九酋長大都督其相府政事琛悉決之卒謚貞平叡生三旬而孤聰慧風成特爲高祖所愛襲爵顯祖受禪晉王天保八年除北朔州刺史都督北燕北蔚北恆三州及庫堆以西黃河以東長城諸鎮諸軍事叡撫新還量

置烽戍內防外禦備有條法大爲軍民所安有無水之處禱而掘井鑿插栽下泉源湧出至後號曰趙郡王泉九年車駕幸樓煩朝於行宮從還晉陽皇建初行并州事孝昭臨崩預受顧託奉迎世祖於鄴突厥侵軼并州帝親御戎六軍進止皆令取窳節度以功復封宣城郡公世祖崩葬後數日議出姦倖和士閔執之彌固乃被搆算拉殺於雀離佛院

李稚廉趙郡高邑人少而寡欲初不從家人有所求請嘗故以金寶授之終不取強付輒擲之於地州牧以其蒙稚而廉故名曰稚廉天平中高祖擢爲秦州開府長史平北將軍稚廉緝諧將士軍民樂悅高祖頻幸河東大相歎賞世宗嗣事除霸府採謂杜弼曰并州王者之基須好長史各舉所知時稚有所稱皆不允衆人未答世宗乃謂陳元康曰我教君好

山西通志卷一百一 李官金一
長史處李稚廉卽其人也遂命爲并州長史常在世宗第內
與隴西辛術等六人號爲館客待以上賓之禮天保初除安
南將軍太原郡守天統中爲并省都官尙書武平五年三月
卒於晉陽贈吏部尙書

斛律金朔州勅勒部人性敦直善騎射行兵用塞外法望塵
識馬步多少嗅地知軍度遠近初爲軍主與懷朔鎮將楊鈞
送茹茹主阿那瓌還瓌見金射獵深歎其工後瓌入寇高陸
金拒擊破之正光末破六韓拔陵反金度陵終敗滅乃統所
部萬戶詣雲州授第二領民酋長勳引南出黃瓜堆爲杜洛
周所破部衆分散金與兄平脫身歸爾朱榮累遷都督從破
葛榮齊高祖建議山東金贊成大策留守信都領恆雲燕朔
顯六州大都督從平晉陽追滅爾朱兆大昌初爲汾州刺史

當州大都督沙苑不利東雍諸城復爲西軍所據金與尉景
庫狄干等討復之大象中高祖禦周文帝於河陽使金徑往
大州爲犄角之勢金到晉州以軍退不行仍與行臺薛循義
共圍喬山之寇俄而高祖至共討平之因從高祖攻下南絳
邵郡等數城武定初除大司馬轉第一領民酋長世宗嗣事
爲肆州刺史齊天保初封咸陽郡王刺史如故冬朝晉陽宮
金病帝幸其宅臨視病愈還州三年就除太師從征奚賊軍
還帝幸肆州與金宴射而去四年解州還晉陽車駕復幸其
第六宮及諸王盡從置酒作樂極夜方罷帝忻甚詔金孫武
都尙義甯公主成禮日帝從皇太后幸金宅皇后太子及諸
王等皆從其見親待如此後詔率二萬騎屯白道以備茹茹
表陳擊取之勢顯祖於是率眾與金共討於吐頽獲二萬餘

戶而遷晉位右丞相遷左丞相卒

斛律光字明月金子也少工騎射以武藝知名當時傳號落
鵬都督天保三年除晉州刺史東有周天柱新安牛頭三成
招引亡叛屢爲寇竊七年光率步騎五千襲破之又大破周
儀同王敬儒等獲口五百餘人雜畜千餘頭而還九年又率
眾取周絳川白馬滄交翼城等四戍除朔州刺史十年二月
率騎一萬討周開府曹迴斬之柏谷城主儀同薛禹生棄城
奔遁遂取文侯鎮立戍置柵而還乾明元年除并州刺史天
統元年轉大將軍三年襲爵咸陽王并襲第一領民酋長轉
遷太保武平元年詔加右丞相并州刺史冬率步騎五萬於
玉壁築華谷龍門二城與周齊國公宇文顥申國公拓跋顯
敬等相持憲等不敢動光乃進圍定陽仍築南汾城置州以

逼之夷夏萬餘戶並來內附二年率眾築平隴衛壁統戎等
鎮戍十有三所周柱國枹罕公普屯威柱國韋孝寬等步騎
萬餘來逼平隴與光戰於汾水之北光大破之俘斬千計軍
還詔復令率步騎五萬出平陽道攻姚襄白亭城戍皆克之
獲其城主儀同大都督等九人捕虜數千人拜左丞相祖珽
穆提婆暨何洪珍構譖之拉殺於涼風堂盡滅其族周武帝
聞光死大喜赦其境內後人鄴追贈上柱國公指詔書曰此
人若在朕豈能至鄴

堯奮字彥舉上黨長子人雄弟也賜爵安夷縣子晉伯爲南
汾州刺史胡夷畏憚之西魏行臺薛崇禮舉眾攻奮與戰大
破之崇禮兄弟乞降送於相府轉潁州卒

韓軌字伯年太安狄那人高祖鎮晉州引爲鎮城都督贊成

大策封平昌縣侯仍督中軍從破爾朱兆於赤洪嶺再遷秦州刺史甚得邊和高祖巡秦州欲以軌還仍賜城人戶別絹布兩匹州人田昭等七千戶皆辭不受唯乞留軌高祖嘉歎乃留焉頻以軍功晉封齊受禪拜大司馬卒謚肅武

潘樂字相貴廣甯石門人神武出牧晉州引樂爲鎮城都將累以軍功拜東雍州刺史神武嘗議欲廢州樂以東雍地帶山河境連胡蜀形勝之會不可棄也遂如故齊受禪封河東郡王拜司徒

慕容儼字恃德清都成安人儼之後也爾朱敗歸高祖以勳累遷安東將軍高涼太守東雍州刺史沙苑之敗西魏荊州刺史郭鸞率眾攻儼拒守二百餘日晝夜力戰大破鸞軍斬首三百餘級又擒西魏刺史郭他時諸州多有翻陷唯儼獲

全晉號鎮南將軍武定三年從攻玉壁賜帛七百匹并衣帽等齊天統二年別封猗氏縣公五年晉義安王武平中卒高勣字敬德清河王岳子改封樂安王出爲朔州行臺僕射後主晉州敗太后從土門道還鄴都勣統領兵馬侍衛時佞幸閹寺猶行暴虐民間無犬悉放鷹犬搏噬取之勣收儀同三司荀子溢徇軍欲行大戮太后有令然後釋之

右北齊十四人

諡晉行
聖朝史

宇文神舉太祖之族子倜儻英贍襲父光爵長廣縣公高祖東伐詔神舉從軍并州平卽授并州刺史加上開府儀同大將軍并州齊氏別都控帶要重平定甫爾民俗澆訛豪右之家多爲姦猾神舉勵精爲治示以威恩旬月之間遠邇悅服晉柱國大將軍封東平郡公增邑通前六千九百戶所部東

壽陽縣土人相聚爲盜率其黨五千人來襲州城神舉以州兵討平之宣政元年稽胡反叛入寇西河神舉率眾與越王盛討平突厥遣騎赴救神舉又以奇兵擊之突厥敗走稽胡於是款服卽授并潞肆石等四州十二鎮諸軍并州總管文宣初鳩於馬邑

韋叔裕字孝寬京兆杜陵人少以字行沈敏和正涉獵經史大統六年爲晉州刺史尋移鎮玉壁兼攝南汾州事先是山胡恃險屢爲劫盜孝寬示以威信州境肅然進授大都督十二年齊神武領山東之眾志圖西入以玉壁衝要先命攻之連營數十里至於城下盡攻擊之術孝寬咸拒破之神武無如之何乃遣倉曹參軍祖孝徵謂曰未聞救兵何不降孝寬報云我城池嚴固兵食有餘攻者自勞守者常逸孝寬關西

男子必不爲降將軍也孝寬弟子遷先在山東又鎖至城下臨以白刃云若不早降便行大戮孝寬慷慨激揚畧無願意士卒莫不感勵神武苦戰六旬傷及病死者十四五智力俱困因而發疾其夜遁去後因此忿患遂殂魏文帝嘉孝寬功令殿中尙書長孫紹遠左丞王悅至玉壁勞問授驃騎大將軍開府儀同三司晉爵建忠郡公廢帝二年入爲雍州刺史恭帝二年周文北巡命還鎮玉壁周孝閔帝初入爲小司徒保定初以孝寬立勳玉壁遂於玉壁置勳州仍授勳州刺史孝寬善於撫御能得人心所遺間諜入齊者皆爲盡力亦有齊人得孝寬金貨遙通書疏故齊動靜周朝皆先知時有主帥許益孝寬託以心膂令守一戍益乃以城東入孝寬怒遣謀取之俄而斬首而還其能致物情如此汾州之北離石以

南悉賊抄掠居人阻斷河路孝寬深患之而地入於齊無方
誅翦欲當其要處置一大城乃於河西徵役徒十萬甲士百
人遣開府姚岳監築之岳色懼以兵少爲難孝寬曰計成此
城十日卽畢旣去晉州四百餘里一日創手二日僞境始知
設令晉州徵兵二日方集謀議之間自稽三日計其軍行二
日不到我之城隍足得辦矣乃令築之齊人果至南首疑有
大軍仍停留不進其夜又令汾水以南傍介山稷山諸村所
在縱火齊人謂是軍營遂收兵自固版築克就卒如其言後
武帝志在平齊孝寬上疏陳三策書奏武帝遣使重幣聘齊
後遂大舉再駕而定山東卒如孝寬之策五年帝東伐邊幸
玉壁觀禦敵眾之所深歎美之移時乃去孝寬請爲先驅帝
以玉壁要衝非孝寬無以鎮之乃不許及趙王招率兵出稽

胡興大軍犄角乃勅孝寬爲行軍總管圍守華谷以應接之
孝寬克其四城武帝平晉州復令孝寬還舊鎮及帝凱還復
幸玉壁詔孝寬隨駕還京晉上柱國大象二年平相州還十
一月卒諡襄

王長述京兆霸城人魏太尉熊孫襲扶風郡公改封龍門周
時爲晉州刺史轉玉壁總管長史歷職並有能名以功進柱
國隋開皇初卒諡莊

韓裒字宏業眉昌黎涉獵經史深沈有遠略保定三年爲汾
州刺史州界北接太原當千里徑先是齊寇數入民廢耕桑
前後刺史莫能防扞裒至適會寇來裒乃不下屬縣人既不
及設備以故多被抄掠齊人喜相謂曰汾州不覺吾至先未
集兵今者之還必莫能追躡我矣由是益懈不爲營壘裒已

先勅精銳伏北山中分據險阻邀其歸路乘其眾怠縱伏擊之盡獲其眾故事獲生口者並囚送京師哀因是奏曰所獲賊眾不足爲多俘而辱之但益其忿耳請一切放還以德報怨有詔許焉自此抄兵頗息

楊敷字文衍華陰人鈞之孫也少有志操襲鈞爵臨貞縣伯周初晉侯天和六年爲汾州諸軍事汾州刺史晉公齊將段孝先率眾五萬來寇梯衝地道晝夜攻城敷親當矢石隨事捍禦拒守累旬孝先攻之愈急時城中兵不滿二千戰死者已十四五糧儲又盡公私窮蹙齊公憲總兵赴救憚孝先不敢進軍敷知必陷沒乃召其眾謂之曰吾與卿等俱在邊鎮實願同心戮力破賊全城但彊寇四面攻圍日久吾等糧食已盡救援斷絕守死窮城非丈夫也今勝兵之士猶數百人

欲突圍出戰生死一決儻或得免猶冀生還受罪闕廷孰與
死於寇乎吾計決矣於諸君意何如衆咸涕泣從命敷乃率
見兵夜出擊殺齊軍數十人齊軍衆稍卻俄而孝先率諸軍
盡銳圍之敷殊死戰矢盡爲孝先所擒齊人方欲任用之敷
不爲之屈遂以憂懼卒於鄴高祖平齊謚忠壯

李淑仁隴西人朔州刺史驍健有武力征伐多奇功

庫狄迴洛代人朔州刺史少有武力儀貌魁偉以果斷稱

宇文深測弟性鯁正有器局年數歲使累石爲營伍折草作
旌旗及長好讀兵書從孝武入關齊神武屯蒲坂分遣其將
趣潼關高敖曹圍洛陽太祖尋大破齊神武軍如深所策六
年監李弼軍討白額稽胡有戰功封長樂縣侯歷東雍州別
駕使持節大都督東雍州刺史深爲政嚴明示民以信抑挫

豪右吏民懷之周初晉安化縣公卒謚成康

右北周八人 都督總管刺史

李雄字毗盧趙郡高邑人周時以討汾州功位上開府隋初進封高都郡公晉王廣出鎮并州以雄為河北行臺兵部尚書上謂雄曰吾兒少未更事以卿兼文武才今推誠相委吾無北顧之憂矣雄當官正直侃然有不可犯之色王甚敬憚吏民稱焉歲餘卒於官

韋師字公穎京兆杜陵人周賓部大夫隋開皇初賜爵并陘侯累遷河北道行臺兵部尚書詔為山東河南十八州安撫大使兼領晉王廣司馬終汴州刺史有治名謚曰定王韶字子相太原晉陽人周建德六年從平齊封晉陽縣公隋初進爵項城郡公晉王廣鎮并州除河北道行臺右僕射

韶性剛直王甚憚之每事諮詢嘗奉使檢行長城王穿池起三山韶還白鎖而諫王謝罷之開皇十一年上幸并州以稱職特加勞勉秦王俊爲并州總管仍爲長史歲餘馳驛入京卒

宇文弼字公輔洛陽人周武帝時爲內史都上士隋開皇中朝廷以晉陽爲重鎮并州總管必屬親王其長史司馬亦一時高選前長史王韶卒以弼有文武幹用出爲并州長史俄以父艱去職尋韶起之後歷朔代二州總管皆有能名

李圓通京兆涇陽人初給事隋高祖周末授儀同隋開皇中拜并州總管長史時秦孝王仁柔少斷決府中事多決於圓通入爲司農卿後數歲自刑部尙書復爲并州長史孝王得罪圓通亦坐免卒贈柱國

獨孤楷字修則歷官三州總管有惠政大業初轉并州總管
遇疾喪明上表乞骸骨上曰公先朝舊臣歷職二代高風素
望臥以鎮之無勞躬親簿領也遣其長子浚雲監省郡事數
載轉長平太守未視事而卒諡曰恭

周搖字世安洛陽人剛果有武藝性謹厚動遵法度初仕周
開府儀同三司從平齊每有戰功授柱國封夔國公拜晉州
總管時隋高祖爲定州總管文獻皇后自京師詣定路經搖
所至禮甚薄白后曰公解甚富於財限法不敢輒費又王臣
無得效私高祖以其奉法每嘉之隋開皇中卒諡曰恭
源雄字世略西平樂都人隴西王篡子周封朔方郡公隋歷
朔州總管突厥來寇雄輒捕斬之深爲北部所畏平陳進位
上柱國復鎮朔州二歲徵還卒

郭衍字彥文太原介休人周儀同大將軍伐齊令衍從陳王守千里徑又從戰於晉州追至高壁大破之仍從平并州以功授上柱國累封武山郡公隋開皇五年授朔州總管所部恆安鎮北接番境常勞轉運衍乃選沃饒地置屯田歲剩粟萬餘石民免轉輸之勞又築桑乾鎮皆稱旨十年從晉王廣鎮揚州大業中再封真定侯卒謚襄

李充隴西成紀人慷慨有英畧開皇中授上柱國武陽郡公拜朔州總管甚有威名爲寇所憚

裴肅字神封河東聞喜人開皇十七年自繕部侍郎遷朔州長史有能名

杜彥雲中人周累封襄武縣侯隋開皇初進爵公累轉雲州總管十八年拜朔州總管果強自任騎射惟精績樹平陳威

昭禦寇突厥寇雲州復拜雲州總管

賀婁子幹字萬壽本代人世居關右周時封武川縣公隋晉
鉅鹿郡公開皇中拜雲州刺史甚爲寇所憚後數年突厥雍
虞閭遣使請降并獻羊馬詔爲行軍總管出西北道應接之
還拜雲州總管以突厥所獻馬百匹羊千口賜之下書曰自
公守北門風塵不警突厥所獻還以賜公母憂去職卒諡懷

右隋十三人總管

竇靜字元休岐州平陵人抗子武德初累轉并州大總管府
長史時突厥數爲邊患軍糧不屬靜表請太原置屯田以省
餽運議者以民物凋零不宜動衆書奏不省靜頻上書辭甚
切至於是徵入朝與裴寂等爭論於殿庭寂等不能屈竟從
靜議歲收粟十萬斛高祖善之令檢校并州大總管靜又請

斷石嶺關以爲邨塞復從之貞觀初封信都男歷遷民部尙書卒諡肅

李神符高祖從父弟封襄邑王武德四年爲并州總管頡利來寇出兵戰於汾水東敗之又勝於沙河之北累遷開府儀同三司卒

劉世讓醴泉人高祖時爲檢校并州總管突厥入寇馳騎八百赴之敵軍大至乃保武州立柵遏拒敵使其友鄭元璿來說世讓叱曰丈夫奈何爲賊作說客耶敵遂引去制褒美之召拜廣州總管高祖問備邊策世讓請於崞城置智勇之將多儲金帛數出奇兵略馬邑城高祖使馳驛往經略之突厥懼乃縱反問言世讓與可汗通謀高祖不察遂遇害

李勣字懋功曹州離狐人本姓徐貞觀元年拜并州都督三

年爲通漠道行軍總管出雲中與突厥戰走之遂勒兵從李靖前屯磧口降突厥部落五萬時高宗爲晉王遙領并州大都督授勅光祿大夫行并州大都督府長史十一年封英國公在并州十六年令行禁止號爲稱職太宗謂侍臣曰隋不能精選賢良安撫邊境惟解築長城以備突厥情識之惑一至於此朕今委任李勣於并州遂使突厥畏威遁走塞垣安靜豈不遠勝築長城耶召爲兵部尙書尋爲朔方道行軍總管敗薛延陀子大度設於青山高宗初累拜尙書左僕射乾封二年卒

裴懷古壽春人儀鳳中詣闕上書以監察御史使突厥不肯拜亡達并州長史武重規左右爭執之有果殺嘗識懷古疾呼曰裴御史也遂免累遷并州大都督府長史弭亂辨枉人

吏愛慕神龍中遷左羽林大將軍行未達都復授并州長史
吏人聞懷古還老幼歡迎時崔宣道代爲并州下車而罷出
郊以候懷古恐傷宣道意命官吏驅逐出迎入百姓奔赴愈
衆其爲人所思如此俄轉幽州都督卒

婁師德鄭州原武人擢進士第天授初以軍功累授左金吾
將軍兼檢校豐州都督知營田事衣皮袴率士屯田積穀數
百萬兵以饒給無轉餉和羅之勞長壽元年召拜夏官侍郎
同平章事封譙縣子聖曆二年突厥入寇令檢校并州長史
仍充天平軍大總管是歲九月卒贈涼州都督諡曰貞師德
深沈有度量其弟守代州辭之官教之耐事弟曰人有唾面
潔之乃已師德曰未也潔之是違其怒正使自乾耳爲將相
三十年獨能以功名始終

崔神慶義元次子舉明經累遷萊州刺史入朝待制則天以神慶歷職有美政又其父嘗有勳贊勳擢拜并州長史因謂曰并州朕之枌榆又有軍馬比日簡擇無如卿者前後長史皆從尙書爲之以其委重所以授卿也因自爲按行圖擇曰而遣之神慶到州有豪富僞作改錢文勅文書下州穀麥踊貴百姓驚擾神慶執奏以爲不便下制褒賞之先是并州有東西二城隔汾水神慶始築城相接每歲省防禦兵數千人邊州甚以爲便坐兄神基貶卒贈幽州都督

魏元忠宋州宋城人高宗時上書言兵務授祕書省正字聖曆二年拜鳳閣侍郎同平章事檢校并州長史相王爲并州元帥又以元忠爲副時奉宸令張易之嘗縱其家奴陵暴百姓元忠嘗殺之權豪莫不敬憚突厥與吐蕃犯塞加大總管

拒之元忠在軍無所克獲然亦未嘗敗失神龍初復知政事
封齊國公

張循憲則天時以御史爲河東採訪使事有未決病之間吏
曰若頗知有嘉客乎吏以猗氏張嘉貞對因召見咨以事命
草奏武后以爲能對皆嘉貞所爲請以官讓后乃拜嘉貞監
察御史而擢循憲司勳郎中疇其得人

張嘉貞蒲州猗氏人則天未累遷并州長史爲政嚴肅甚爲
人吏所畏開元初奏事至京師上聞其善政數加賞慰時突
厥新附散居太原以北嘉貞奏請置軍以鎮之於是始於并
州置天兵軍以嘉貞爲使六年入朝累拜同平章事遷中書
令封河東侯卒謚恭肅

薛訥字慎言絳州萬泉人仁貴子則天末爲并州大都督府

長史兼檢校左衛大將軍後封平陽郡公爲朔方行軍大總管卒謚昭訥沈勇寡言用兵臨大敵益壯

王峻滄州景城人擢明經第則天末累拜鴻臚卿充朔州副大總管安北大都護開元二年以破吐蕃功封清源縣男進并州都督府長史明年突厥默啜爲拔曳固所殺其下多降分置河曲峻上書言宜置內地不然者且必有變書未報而虜已叛乃敕峻將并州兵濟河以討之峻間行卷甲捨幕趨山谷夜遇雪恐失期誓於神曰峻事君不以忠不討有罪天所殛者當自蒙罰士衆無非心誠忠而天監之則止雪反風以獎成功俄而和霽自東道追及大破之獲級三千又破跋跌部勺磨等封清源公徙封中山郡公進吏部尙書太原尹代張說爲兵部尙書同中書門下三品充朔方節度大使河

北河西河東隴右盡屬卒贈尙書左丞相謚忠烈

張說字道濟洛陽人對策乙等歷拜中書令封燕國公開元七年檢校并州長史兼天兵軍大使攝御史大夫兼修國史仍齋史本隨軍修撰朔方軍大使王晔誅河曲降虜阿布思九姓同羅拔曳固等疑懼說持節從輕騎二十直詣其部宿帳下召見酋豪慰安之副使李憲諫說報曰吾肉非黃羊不畏其食血非野馬不畏其刺士常見危致命亦吾効死秋也由是九姓遂安党項羌攻銀城將步騎出合河關破之明年詔爲朔方節度大使親行五城督士馬議徙河曲六州諸部五萬於唐鄧仙豫間奏罷邊鎮兵二十萬還農上幸并州說見上說上由河東入京師祠后土爲三農祈穀上納之卒贈太師謚曰文貞

崔隱甫貝州武城人爲殿中侍御史以劾浮屠惠範貶先天
初擢汾州長史兼河東道支度營田使開元九年拜太原尹
民刻石頌其美政十二年入歷御史大夫威名赫然以憂去
二十四年起爲太原尹仍爲河東採訪處置使後歷東都留
守卒謚曰忠隱甫爲政嚴肅甚爲人吏所嘆服

崔日用滑州靈昌人舉進士爲芮城尉景雲中歷拜黃門侍
郎參知機務封齊國公開元十年轉并州大都督府長史卒
并人懷其惠吏民數百皆縞服送喪謚曰昭

韋湊字彥宗京兆萬年人封彭城郡公開元十年自汾州刺
史拜太原尹兼節度支度營田大使又兼北都軍器監邊備
修舉詔賜時服勞勉之及病遣上醫臨治其年卒謚曰文
王忠嗣太原祁人太谷男海賓子父歿於陣忠嗣幼育禁中

試守代州別駕信安王禕爲河東副元帥引爲兵馬使開元二十一年遷左威衛將軍封清源縣男兼檢校代州都督拜左金吾衛將軍兼左羽林上將軍河東節度副使兼大同軍使二十八年以本官兼代州都督充河東節度使明年代韋光乘爲朔方節度仍權知河東節度使討奚奴皆敗之其年以田仁琬充河東節度使忠嗣依舊朔方節度兼靈州都督營木刺蘭山平突厥烏蘇米施可汗築大同靜邊城併受降振武爲一城天寶四載以功攝御史大夫充河東節度採訪使進封清源縣公訓練士馬隨闕繕補士樂爲用軍每出召屬長付以兵使授士卒無遺矢亡鏃之費器甲充牣自朔方雲中緣邊數千里當要害地開拓舊城或自創制斥地各數百里自張仁奩之後四十餘年忠嗣繼之復罷戰五載持節

充西河隴右節度使其月又權知朔方河東節度使事忠嗣
佩四將印控制萬里爲唐名將尋遷鴻臚卿餘如故又加金
紫光祿大夫以詔問取石城堡方略忤旨李林甫復陷之貶
漢陽太守轉漢東郡太守卒寶應元年追贈兵部尙書

宋慶禮沼州永平人擢明經開元中以習識邊事拜河東河
北營田使善騎日能馳數百里性甘勞苦好興作濱塞掘堦
植兵以邀虜徑再轉營州都督卒贈工部尙書謚曰敬

李嵩淮安王神通元孫開元中累遷黃門侍郎兼太原尹仍
充太原以北諸軍節度使太原舊俗有僧徒以習禪爲業及
死不斂但以尸送近郊以飼鳥獸如是積年土人號其地爲
黃所側有餓狗數千侵害幼弱遠近患之前後官吏不能禁
止鬻到官申明禮憲期不再犯發兵捕殺羣狗其風遂革久

之轉太常卿屬所歷皆以威重見稱累封武都縣伯卒
郭子儀華州鄭縣人以武舉高等累遷單于副都護振遼軍
使天寶八載木刺山始築橫塞軍及安北都護府命子儀領
其使拜左衛大將軍十三載移橫塞軍及安北都護府於永
清柵北築城仍改橫塞爲天德軍子儀爲之使兼九原太守
朔方節度右兵馬使十四載詔爲衛尉卿兼靈武太守充朔
方節度使以本軍東討安祿山收靜邊軍斬賊將周萬頃擊
高秀巖河曲敗之遂收雲中馬邑開東陘加御史大夫因引
軍下井陘與李光弼合至德二載復蒲州崔乾祐走收永豐
倉關陝始通河東河西河南州縣悉平進司空河東副元帥
復兩京以功加司徒封代國公後召還上元三年二月河中
軍亂殺其帥李國貞時太原節度鄧景山亦爲部下所殺乃

以子儀爲朔方河中北庭潞儀沁澤等州節度行營兼興平定國副元帥充本管觀察處置使進封汾陽郡王屯絳州上引至臥內曰河東事一以委卿三月至絳擒殺國貞賊首王元振數十人誅之太原辛雲京聞之亦誅害景山者河東諸鎮皆惕息四月代宗卽位罷副元帥明年十月吐蕃至武功詔爲關內副元帥鎮咸陽寇退時僕固懷恩方頓軍汾州掠汾并諸邑乃命兼河東副元帥河中節度觀察使鎮河中僕固瑒衆來歸懷恩走靈州明年十一月拜尙書令因辭永泰元年五月拜都統河南道節度行營復鎮河中急召屯涇陽破吐蕃還河中大厯三年十月兼邠甯節度自河中移鎮邠州德宗卽位詔還朝攝冢宰賜號尙父進位太尉中書令建中二年卒贈太師謚曰忠武

李光弼營州柳城人天寶十一載拜軍于副都護祿山之亂郭子儀薦光弼堪闔寄十五載正月爲雲中太守攝御史大夫充河東節度副使知節度事二月轉魏郡太守河北道採訪使以朔方兵五千出土門屢敗賊會潼關失收兵入井陘肅宗理兵靈武遣使追赴行在授戶部尙書兼太原尹北都留守同中書門下平章事以景城河間卒五千赴太原時節度王承業軍政不修詔御史崔衆交兵每侮易承業光弼素不平至是交兵衆以麾下來光弼出迎旌旗相接而不避光弼怒其無禮又不卽交兵令收繫之頃中使至除衆中丞懷其勅問衆所在光弼曰衆有罪繫之矣中使以勅示光弼曰今只斬御史若宣制命卽斬中丞若拜宰相卽斬宰相中使懼遂寢之而還翌日以兵仗圍衆至碑堂下斬之威震三軍

命其親屬弔之二年賊將史思明蔡希德等四僞帥率眾十餘萬來攻太原光弼經河北苦戰精兵盡赴朔方麾下皆烏合眾不滿萬人思明謂諸將曰光弼兵寡弱可屈指取太原鼓行而西圖河隴朔方無後顧矣光弼部將聞之皆懼議欲修城以待光弼曰城周四十里賊垂至與役是未見敵而自疲矣乃躬率士卒百姓於城外掘壕自固增壘於內壞輒補之賊逼城發强弩機石賊驍勁卒死者十二三城中長幼皆伏其勸智懦兵增氣皆欲出戰思明揣知先歸留蔡希德等攻之月餘卒敢死士出擊大破之斬首七萬餘級賊始至及遁五十餘日光弼設小幕宿於城東南隅有急卽應行過府門未嘗迴顧賊退三日決軍事畢始歸府第轉檢校司徒收清夷橫野等軍擒賊將李宏義以歸詔守司空兼兵部尙書

中書門下平章事進魏國公乾元元年入朝遷侍中改鄭國
二年七月制拜天下兵馬副元帥知節度行營事八月九節
度兵皆潰惟光弼所部不散整衆還太原加太尉兼中書令
代郭子儀爲朔方節度兵馬副元帥十月破史思明於河陽
及邙山敗光弼渡河保聞喜尋拜河中尹晉絳等州節度使
未幾鎮臨淮寶應元年進封臨淮郡王二年卒於徐州贈太
保諡曰武穆

王思禮高麗人至德中從收二京封霍國公爲關內行營節
度兼潞沁等州節度乾元元年總關中潞州行營兵三萬騎
八千圍相州軍潰獨完軍還二年李光弼鎮河陽制以思禮
爲太原尹北京留守河東節度副大使上元二年卒贈太尉
諡曰武烈思禮持法嚴整士不敢犯在太原器甲完精儲粟

至百萬斛云

辛雲京蘭州金城人有膽決官北京都知兵馬使代州刺史鄧景山統馭失所爲軍士所殺請雲京爲節度使因授兼太原尹封金城郡王雲京質性沈毅部下有犯令者不貸絲毫其賞功效亦如之故三軍整肅回紇恃舊動入界輒肆狼貪至太原不敢惕息數年太原大治無烽警虞累加檢校左僕射同中書門下平章事大曆三年八月卒贈太尉諡曰忠獻馬燧字洵美汝州郟城人父季龍嵐州刺史燧沈勇多算實應中澤潞節度使李抱玉署爲趙城尉時回紇還國恃功恣睢所過皆剽傷賓介無敢往饋勞燧自請典辦具乃先賂其酋與約得其旗章爲信犯令者得斬之又取死囚給役左右小違令輒戮死虜大駭至出境無敢暴者抱玉才之因進說

曰僕固懷恩將必窺太原當爲備抱玉令燧說相衛薛嵩嵩告絕于懷恩卽署燧左武衛兵曹叅軍大厯中累遷河東節度留後進節度使時太原承鮑防之敗兵力衰竭燧募厮役得數千人悉補騎士教之戰數月成精卒造鎧必短長三制稱上所衣以便進趨爲戰車冒以狡狴象列戟於後行以載兵止則爲陣遇險則制衝冒器用完銳居一年闢廣場羅兵三萬以肄威震北方建中二年朝京師遣檢校兵部尙書封幽國公田悅攻臨洺詔燧以步騎二萬救之出嚙口屢敗悅兵以功封北平郡王會西符道軍太原時北邊數有警燧念晉陽王業所基宜固險以示敵乃引晉水架汾而屬之城濬爲東隍省守陴萬人又醞汾環城樹以固隄詔兼保甯軍節度使李懷光反詔爲河東保甯奉誠軍行營副元帥與渾瑊

賂元光討之檄降晉隰慈州因拜晉絳慈隰節度使燧固讓
康日知且言因降授節恐後有功者踵以爲例上嘉許籍府
庫兵仗以授日知乃略定絳裨將谷秀違令掠士女斬以狗
又勝賊寶鼎河中平遷光祿大夫兼侍中還自太原上賜宸
展台衡二銘以言君臣相成之美勒石起義堂上榜其額以
寵之貞元二年詔爲綬銀麟勝招討使次石州尙結贊乞盟
明年還太原入朝奪兵拜司徒兼侍中卒贈太傅諡曰莊武
李自良兗州泗水人薛兼訓節度太原爲牙將鮑防代兼訓
回紇入寇遣大將焦伯瑜等擊之自良請築二壘搃歸路堅
壁勿出防不聽伯瑜戰百井大敗由是知名馬燧代防表爲
軍候自良勤且有謀燧倚信之從討田悅還攻河中數履鋒
陷陣功在諸將右貞元三年燧入朝用自良代自良以事燧

久不敢當議者多其讓授右龍武大將軍上以河東近胡謂曰卿於進退甯不有禮然守北門無易卿者勉爲朕行乃以檢校工部尙書充河東節度使居治九年舉不愆法簡儉易循民不知有軍上下諧附卒于官

嚴綬蜀人貞元十七年自行軍司馬拜檢校工部尙書兼太原尹御史大夫北都留守充河東節度支度營田觀察處置等使以與平蜀夏功拜司空封扶風郡公在鎮九年爲政寬惠士馬蕃息境內稱治入拜尙書右僕射後拜太傅卒贈太保

令狐楚字殼士貞元七年進士桂管觀察使王拱愛其才奏聘之時楚父承簡掾太原有庭闈之戀又感拱厚意乃徑往桂林謝拱不預遊宴乞歸奉養卽還太原人皆義之李說嚴

綬鄭儋相繼鎮太原皆辟爲從事自掌書記至節度判官殿
中侍御史楚才思俊麗德宗好文每太原奏至能辨楚所爲
數稱之鄭儋在鎮暴卒不及占後事軍中諠譁將有急變中
夜十數騎持刃迫楚至軍門草遺表諸將圍視楚色不變搗
管卽成讀示三軍無不感泣軍情乃安由是名益重元和十
四年授中書侍郎同平章事太和六年二月爲太原尹北都
留守河東節度等使楚久在并州練其風俗因人所利而利
之雖屬歲旱人無轉徙楚始自書生隨計成名皆在太原實
如故里及是秉旄作鎮邑老歡迎楚撫綬有方軍民胥悅七
年六月入爲吏部尙書封彭陽郡公卒贈司空諡曰文
王鏐字昆吾太原人元和二年除檢校司徒河中節度居三
年兼太子太傅移河東河東自范希朝後兵騎殘耗鏐能補

完尚費未幾兵至五萬騎五千財用豐餘會回鶻并摩尼師入朝錡欲示威武傾駭之乃悉軍迎延列五十里旗幟光鮮戈鎧犀密回鶻恐不敢仰視錡偃然受其禮上聞嘉之卽除檢校司空同中書門下平章事十年卒贈太尉

柳公綽字起之解人家華原舉賢良方正慈隰觀察使姚齊梧奏爲判官得殿中侍御史累遷刑部尙書京兆尹太和四年檢校左僕射太原尹北都留守河東節度觀察等使遭歲歉樽節用度輟宴飲衣食與士卒均北部梅祿將軍李暢以馬來市使牙將祖考恭單馬勞問暢感義出涕陞北沙陀部諸部長之公綽召其酋朱邪執宜抵雲朔塞下治廢柵十一募兵三千付之留屯塞上其妻母來太原者令妻梁國夫人飲食問遺之沙陀感恩深得其効六年以病求代三月還京

師授兵部尚書卒諡曰成

李載義常山愍王之後爲盧龍節度使封武威郡王累拜太保同平章事太和七年爲北都留守兼太原尹河東節度觀察處置等使回鶻使人朝所至強暴時李暢曉華語益恣肆載義召與語曰可汗使將軍朝貢以固甥舅之好不容將軍暴也朝廷厚饗餼以禮客有不至吏皆坐死若將軍部伍不戢剽掠廬舍載義必殺爲盜者將軍其戒之罷防守之兵使兩卒伺其門暢嚴憚訖不敢犯令九年加侍中開成二年卒贈太尉

盧簡求字子臧蒲州人長慶初進士會昌十四年八月代裴休爲太原尹北都留守充河東節度觀察等使簡求辭翰縱橫長於應變歷涇原義武鳳翔及太原四鎮皆控邊陲以邊

警移授所至撫御晏然太原軍素管吐渾契苾沙陀三部落
前政或要盟誓或質子弟簡求開懷撫待接以恩信所質子
弟一切遣之三部欣然聽命咸通中以疾辭致仕卒贈尚書
左僕射

王宰智興子懷州溫人本名晏宰後去晏獨名宰會昌中以
忠武節度討劉稹取天井關攻陵川破賊石會關進攻澤州
昭義平遂厯上黨太原節度使扞回鶻党項屢立邊功後以
太子少保分司東都進少傅卒

畢誠字存之鄆州須昌人太和中進士拜翰林學士大中末
召問邊事誠列破羌狀上悅曰不期頗牧在吾禁中卽節度
邠甯邊境又安移鎮潞澤充昭義節度使二年改太原尹北
都留守河東節度明賞罰謹斥候修杷頭七十烽期年諸部

革心就加尙書左僕射移鎮宣武遂同平章事在相位三年十月以疾固辭位詔守兵部尙書同平章事出鎮河中十二月卒於鎮

劉瞻字畿之彭城人大中進士咸通中爲太原尹河東節度使十年同平章事十一年以諫誅醫官貶復爲平章事卒瞻性廉約終始完潔

崔彥昭字思文清河人大中三年進士精於吏事數治郡有聲十一年檢校刑部尙書太原尹北都留守河東節度管內觀察等使時徐泗用兵後北戎多警沙陀諸部動干紀律彥昭柔以恩惠來以兵威三年間北門大治軍民歌之考滿受代耆老數干詣闕乞留詔留任十五年三月召爲吏部侍郎乾符初同平章事罷相分司卒

李蔚字茂休隴西人開成進士第咸通六年同平章事加中書侍郎罷相歷藩鎮乾符六年河東殺其帥崔季康用邠甯李侃代之士不附以蔚嘗爲太原從事軍民懷之詔爲太原尹北都留守河東節度觀察等使十月至鎮下車三日卒鄭從讜字正求滎陽人僕射餘慶孫登進士咸通三年檢校刑部尙書太原尹北都留守河東節度觀察等使踰年厯同平章事門下侍郎乾符中沙陀李國昌累侵忻代等州前帥竇瀚李侁李蔚相繼以重臣鎮并部皆不能逼俄而康傳圭爲張彥球部所殺軍士益驕朝廷難於擇帥詔從讜檢校司空同平章事太原尹北都留守河東節度兼行營招討等使詔自擇參佐乃奏王調爲副使劉崇龜爲節度判官趙崇爲觀察判官劉崇魯充推官李渥充掌書記崔澤充支使開幕

之盛冠於一時中朝人士目河東爲小朝廷言得才多也時承新亂剽掠日旁午從讜神機善斷奸無遁情搜其魁誅之以彥球本善意且才可任釋不問而付以兵故得其死力賊發輒得羣豪惕息黃巢犯闕從讜首倡仗義遣牙將論安後院軍使朱玟率步騎五千人從諸葛爽赴難而李克用以兵奄至營於汾東稱奉詔赴難從讜具厚餼犒勞信宿不發陰縱其下肆掠從讜追安使與大將王蟾高弁薛威踵擊會振武契苾通兵至沙陀收還遺安等屯北百井安擅遣從讜合諸將斬之中和二年詔赦沙陀部使討賊自贖沙陀五部數萬人自嵐石沿河而南不敢蹈境惟克用從數百騎臨城敘別從讜以名馬器幣歸之明年克用破賊授河東節度代從讜克用使來曰方省親雁門願公徐行從讜卽日以監軍周

從寓知兵馬留後掌書記劉崇魯知觀察留後按籍效之時道途多寇行次絳州留數月詔赴行在復秉政進司徒拜侍中卒謚曰文忠

陸象先蘇州吳縣人先天中歷遷河中尹六年廢河中府復名蒲州象先爲刺史仍爲河東道按察使小吏嘗犯罪但示語而遣之錄事白例當杖象先曰人情相去不遠此豈不解吾言若必須行杖卽當自汝始錄事慙懼而退象先嘗謂人曰天下本無事庸人攬之爲煩耳但澄其源則亦何憂不簡所至政如一人吏咸懷思之按察使停入歷太子少保卒

李麟宗室藩子天寶十四載以國子祭酒出爲河東太守河東道採訪使爲政情簡吏民稱之

李承趙郡高邑人建中二年七月拜河中尹河中晉絳都防

禦觀察使居官以貞廉才術見稱於時

渾城鐵勒渾部之後署折衝果毅城永清及天安軍肅宗初
趨行在敗虜於天德大厯中回紇侵太原破鮑防軍拜城都
知兵馬使自石嶺關而南督諸軍犄角虜引去進單于大都
護振武東受降城鎮北大都護府綏銀麟勝州節度副大使
平朱泚授河中絳慈隰節度使河中同陝虢行營副元帥封
咸甯郡王與李晟鈞禮平李懷光檢校司空還屯河中吐蕃
入使鎮奉天寇罷還河中貞元四年還邠甯進檢校司徒兼
中書令十五年卒贈太師諡曰忠武

杜黃裳字遵素京兆杜陵人第進士憲宗初擢門下侍郎同
中書門下平章事元和二年正月檢校司空同平章事兼河
中尹河中晉絳等州節度使封邠國公三年九月卒於河中

贈司徒謚曰宣獻黃裳達權變有王佐大略當大政未久不究其才及處外天下常所屬意

李絳字深之趙郡贊皇人第進士元和中爲翰林學士烏重九縛盧從史吐突承瑾牒署昭義拜中書侍郎同平章事留後尋以足疾求免十四年檢校吏部尙書河中觀察使河中故節制而皇甫鉞惡絳薄其恩議者不直鉞得罪復召爲兵部尙書絳在華州嘗請罷捕鷄戶詔并澤潞太原天威府罷之

呂元膺字景夫鄆州東平人策賢良高第授安邑尉辟長春宮判官李懷光拒命河中輒解去元和中拜河中尹充河中節度等使時方鎮多姑息獨元膺秉正自將監軍及中人往來者無不嚴憚入拜吏部侍郎改太子賓客卒贈吏部尙書

元膺居官始終無訾缺時號名臣

郭釗子儀孫駙馬都尉暖子穆宗初爲河中尹領晉絳慈恩
節度蒞政簡約不撓其俗自理敬宗立歷西川節度使
卯卒贈司徒

王起字舉之太原人登進士太和六年檢校吏部尙書河中
尹河中晉絳節度使時屬蝗旱粟價暴踊豪門閉糴以要善
價起下令家得儲三十斛餘出粟於市隱者死神策士怙勢
不從置於法由是民獲濟焉七年入爲兵部尙書

李襲譽字茂實金州安康人唐初封安康郡公爲潞州總管
突厥旣和親又通使王世充襲譽掩擊悉斬之因委典運以
餽東軍後歷蒲州刺史所蒞以威肅聞

李抱貞字太元河西人抱玉從父弟也沈慮而斷抱玉屬以

軍事授汾州別駕陷僕固懷恩挺身歸京師遷殿中少監陳
鄭潞澤節度留後既謝因言百姓勞逸在牧守願得一州自
效更授澤州刺史兼澤潞節度副使徙懷州仍爲懷澤潞觀
察留後凡八年抱貞策山東有變澤潞兵所走集乘戰伐後
賦重人困軍伍彫剝乃籍戶三丁擇一蠲其徭租給弓矢令
閑月得曹偶習射歲終大校親按籍第能否賞罰比三年皆
爲精兵舉所部得成二萬旣不廩於官而府庫實乃曰軍可
用矣繕甲淬兵遂雄山東天下稱昭義步兵爲諸軍冠久之
爲潞澤節度行軍司馬會昭義節度李承昭病詔抱貞權磁
邢兵馬留後德宗初檢校工部尙書領昭義節度使建中中
詔與河東馬燧合兵擊敗田悅累進檢校尙書右僕射會西
狩諸將各引麾下還屯於時李希烈陷汴李納據鄆李懷光

據河中抱貞獨以數州截然橫絕潰叛中離沮其姦爲羣盜
所憚興元初檢校左僕射同中書門下平章事累進封義陽
郡王復以破朱滔功進檢校司空貞元初入朝詔還鎮抱貞
喜士聞世賢者必欲與之遊雖小善皆卑辭厚幣數千里邀
致之卒子緘以印綸上監軍始發喪歸東都詔贈抱貞太保
王虔休字君佐汝州梁人涉學有武材以信義聞潞澤李抱
貞厚幣招之授兵馬使以從破臨洛功擢步軍都虞候封同
昌郡王貞元十年抱貞卒元仲經等謀樹其子緘虔休正色
語衆曰軍王軍士王士帥亡當稟天子何云云有妄謀衆服
其言得不亂德宗嘉之以邕王爲昭義節度大使擢虔休潞
州左司馬領留後號令撫循軍中大治二歲遷昭義節度使
檢校工部尙書始屬城州縣守宰多署他職不親政故治苟

簡虔休增俸廩遣就部人以分安卒贈尙書左僕射諡曰敬
虔休性格敏節用度旣沒所部帑廩皆可支數歲嘗得太常
樂家劉玠撰繼天誕聖樂因上誕日以獻焉

郝士美字和夫高平金鄉人自潞州從事累拜御史大夫經
畧黔中以平賊功封高平郡公元和六年檢校工部尙書潞
州大都督府長史充昭義節度使昭義自李抱貞以來皆武
臣私廚月費米六千石羊千首酒數十斛潞州困甚士美至
悉去之出廩錢市物自給又虛從史時日具三百人膳以餉
牙兵士美曰卒衛于牙固職也安得廣費爲私恩亦罷之詔
討王承宗大將王獻恣橫逗撓斬以徇下令曰敢後者斬兵
最先有功憲宗喜曰固知士美能辦吾事十二年以疾徵爲
工部尙書卒諡曰景

辛祕隨西人舉五經歷河東司馬元和十二年代都士美爲潞州大都督府長史御史大夫昭義節度澤潞磁洛邢等州觀察使時以再討王承宗澤潞壓境凋費尤甚祕在鎮四歲約出入畜用度府庫積錢十七萬緡糧七十萬斛器械堅良復爲完鎮家無豐財厚產爲時所稱

盧鈞字子和范陽人元和四年進士從裴度爲太原觀察支使遷監察御史白宋申錫之枉由是知名歷轉山南東道節度使會昌四年誅劉稹以鈞寬厚能得衆詔兼節度昭義軍會稹死敕乘驛往及潞石雄兵已入而稹將白惟信率餘卒三千保潞城未下雄召之使往十餘輩皆死鈞次高平惟信獻款鈞與約而遣雄欲盡夷潞兵鈞不聽坐治堂下左右皆雄親卒擊鼓傳漏鈞自居甚安雄引去乃召惟信至送闕下

餘眾悉原俄而與士五千戍代北戍卒反攻城鈞倉卒奔潞城眾迎還斬首惡乃定詔使盡戮之鈞請徐乘其變訖盡誅之拜檢校尙書左僕射尋入拜戶部侍郎後封范陽郡公大中六年檢校司空太原尹北都留守河東節度使九年詔爲尙書左僕射

沈詢吳人第進士咸通中檢校戶部尙書潞州長史昭義節度使治尙簡易人皆便安奴結牙將夜攻詢滅其家贈兵部尙書以左散騎常侍劉潼代爲節度馳至剗奴祭詢

劉潼字子固曹州南華人暹孫登進士第拜昭義節度使徙河東所涖治辦卒贈司空

孫揆字聖圭潞州涉縣人第進士累拜京兆尹昭宗討李克用爲招討副使更授昭義節度使以本道兵會戰克用伏兵

才黃嶺執揆厚禮將用之曰公輩當從容廟堂何爲自履行陣也揆大罵不詘克用怒使以鋸解之鋸齒不行揆謂曰死狗奴解人當束之以版汝輩安知行刑者如其所言晉聲不輟至死昭宗憐之贈左僕射

李克修字崇遠國昌子從討龐勛以功拜朔州刺史兄克用鎮雁門爲奉誠軍使後表昭義軍節度使數出山東擊孟方立又與李罕之攻懷孟克用自將擊方立還軍過潞供饋甚薄克用怒詬而笞之克修慙憤發疾卒克修爲人簡儉潞人素安其政其卒也人皆哀之

李嗣昭太谷縣人天祐三年攻降潞州爲昭義軍節度使梁遣李思安將兵十萬攻潞築夾城以圍之朱溫常遣人招降嗣昭嗣昭斬其使者閉城拒守明年莊宗始攻破夾城嗣昭

完緝兵民撫養甚有恩意

李大恩代州總管武德四年頡利與苑君璋合寇雁門大恩擊卻之明年大恩上言突厥饑馬邑可圖詔殿中少監獨孤晟共擊之晟後約大恩不敢進屯新城頡利自將數萬騎與劉黑闥合圍之大恩戰沒

張公謹字宏慎魏州繁水人貞觀元年拜代州都督上表請置屯田以省轉運又言前後時政十餘事竝見納用遣李靖經略突厥公謹爲副言突厥可取狀太宗納之破定襄敗頡利進封鄯國公轉襄州都督卒謚曰襄十三年改封鄯國公張儉雍州新豐人貞觀初以軍功累遷朔州刺史時頡利自恃強盛每有所求輒遣書稱勅緣邊遞相承稟儉獨拒不受太宗聞而嘉之儉又廣營屯田歲致穀十萬斛邊糧益饒及

遭霜旱勸百姓相贍遂免饑殍州境獨安李靖平突厥有思
結部貧窮離散儉招慰安集之以母憂解朔州後將疑思結
遽奏聞發兵進討仍起儉爲使儉單車推誠入其部落召諸
首領布腹心咸匍匐歸命便移就代州卽令檢校代州都督
勸令營田歲數豐稔慮其私蓄富實易生驕侈表請和羅擬
充貯備蕃人喜悅邊軍大收其利擊高麗封皖城郡公改東
夷都護卒諡曰密

薛仁貴絳州龍門人開耀元年拜右領軍衛將軍檢校代州
都督擊突厥元珍於雲州突厥問曰唐將爲誰曰薛仁貴突
厥曰吾聞薛將軍流象州死矣安得復生仁貴脫兜鍪見之
突厥相視失色下馬羅拜稍稍遁去仁貴因進擊大破之斬
首萬級獲生口三萬牛馬稱是其年卒

程務挺洺州平恩人以軍功遷右領軍衛中郎將破突厥六萬騎於雲州永隆中阿史那伏念叛詔裴行儉討之務挺爲副以功封平原郡公遷左武衛大將軍單于道安撫大使禦突厥善綏禦士服其威愛突厥憚之不敢盜邊後申救裴炎被害突厥聞之宰相慶爲立祠每出師輒禱焉

張仁愿華州下邳人有文武才則天時爲并州都督長史神龍二年移潞州三年突厥入寇朔方軍總管沙吒忠義爲賊所敗詔攝御史大夫代忠義統衆仁愿至軍而賊衆已退乃躡其後夜掩擊大破之先朔方軍北與突厥以河爲界河北岸有拂雲神祠突厥將入寇必先詣廟祭酌求福因牧馬料兵而後渡河時默啜盡衆西擊突騎施婆葛仁愿請乘虛奪取漠南地於河北築三受降城首尾相應以絕其南寇之路

太子少師唐休璟以爲兩漢以來皆北守黃河今於寇境築城恐勞人費功終爲賊虜所有建議以爲不便仁愿固請不已中宗竟從之仁愿表留年滿鎮兵以助功時咸陽兵二百餘人逃歸盡擒之一時斬城下軍中股栗役者盡力六旬而三城就以拂雲祠爲中城與東西兩城相去各四百餘里皆據津濟遙相應接其北皆大磧也拓地三百餘里於牛頭朝那山北置烽堠一千八百所自是突厥不得度山放牧朔方無復寇掠減鎮兵數萬人仁愿初建三城不置壅門及卻敵戰格或曰邊城不爲守備何也仁愿曰兵貴攻取不宜退守寇若至此卽當併力出戰迴顧望城猶須斬之何用守備生其退慙之心也其後常元楷爲總管始築壅門議者益重仁愿而輕元楷焉仁愿嘗奏用監察御史張敬忠等數十人皆

以文章著稱多至大官時稱其知人景龍二年拜左衛大將軍同中書門下三品封韓國公春還朝秋復督軍備邊中宗賦詩祖餞賞賜不可勝紀尋加鎮軍大將軍睿宗初致仕加兵部尚書卒贈太子少傅仁愿爲將號令嚴將吏信服接邊撫師賞罰必值功罪後人思之爲立祠受降城出師輒享焉范希朝河中虞鄉人德宗初除振武節度使加檢校禮部尚書振武有党項室韋諸郡時爲盜希朝於要害置柵堡斥候嚴密人遂獲安爲盜者必殺無赦戎虜甚憚之曰有張光晟苦城久矣今聞是乃更姓名而來其見畏如此蕃落凡有進獻無所受積十四年皆保塞不爲橫城中少樹希朝於他處市柳子命軍人種之俄遂成林居人賴之元和初累遷河東節度使

高霞寓范陽人元和五年以左威衛將軍從吐突承瓘擊王承宗承瓘執昭義盧從史其軍驚遣霞寓諭之麾而大呼曰元惡縛矣公等宜自安卽脫鎧揖而前衆遂定欲留爲帥霞寓聞道去明年改豐州刺史三城都團練防禦使累遷工部尚書左衛大將軍長慶三年爲振武節度使吐蕃攻鹽豐二州以兵五千屯拂雲堆寇引去浚金河溉鹵地數千頃厯右金吾衛大將軍卒贈太保

劉沔字子汪徐州彭城人少客振武節度使范希朝署牙將軍中大會沔提刀立堂下希朝奇之召謂曰後日必處吾上太和中爲天德軍防禦使移振武節度使檢校右散騎常侍單于大都護開成三年突厥劫營沔發吐渾契苾沙陀部萬人擊之賊一轡無返者悉頒所獲馬牛於戰卒築都護府西

北四壘加檢校戶部尙書會昌初遷檢校尙書右僕射回鶻寇天德詔以兵據雲伽關寇引去二年又掠太原振武兵部郎中李拭獨稱沔才乃拜河東節度兼招撫回鶻使檢校尙書左僕射太原尹北京留守進屯雁門關虜寇雲州沔擊之斬七裨將寇殘衆走詔沔追北仍錄李靖平頡利事賜之軍還次代州擒誅歸義軍叛者劉稹拒命詔沔南討屯榆杜稹平進檢校司徒以病致仕卒

史獻忠字元貞建康人少爲魏牙門將以善戰顯名大中初突厥擾河東鈔漕米行賈命爲振武軍節度使先是鎮帥使游奕兵覘戎有良馬牛彊取之歸值十一戎人因興盜掠獻忠廉儉少所欲常曰吾居河朔去此三千里乃乘五健馬今守邊發吾餘俸不患無馬何忍聚市哉故所至莫不懷德累

封北海縣子檢校尙書左僕射卒贈司空

裴諝字士明聞喜人寬子大厯中爲河東和庸鹽鐵等使時關輔大旱諝入計代宗召見便殿問諝權酷之利二歲出入幾何諝久之不對上復問之對曰臣有所思上曰何思對曰臣自河東來其間所厯三百里見農人愁嘆穀菽未種誠宜軫念問人之疾苦而乃責臣以權酷孟子曰理國者仁義而已由是未敢卽對也上前坐曰微公言吾不聞此拜左司郎中厯東都副留守卒贈禮部尙書

司空輿爲度支判官工部侍郎領度支盧宏正以兩池鹽法久弊得費不相償使輿檢鉤釐正條上新法卽表爲兩池使自是課入歲倍用度賴之

陸位以職方郎中兼侍御史總解鹽池有政績聞於朝

韓重華朔州武陵人。歷兩池榷鹽使。度支使盧坦表為代北水運使。開廢田列壁二十益。兵三千歲。收粟二十萬石。後為左金吾衛大將軍。與甘露之難。

右唐六十七人

案唐代太原蒲州潞安代州及歸後並皆為節鎮略類次之而以河

東監司
終焉

山西通志卷一百一

山西通志卷一百一

名宦錄一

四七